

Ni Pangulong Dieter F. Uchtdorf

Ikaduhang Manuglaygay sa Unang Pangulohan



Pagpunteriya sa Sentro

Sang sini lang, nagtan-aw ako sang grupo sang mga tawo nga nagapraktis sang kinaadman sa pagpana. Sa pagtan-aw lang, nangin klaro sa akon nga kon gusto mo gid makabisado ang pana kag baslay, kinahanglan ang tiyempo kag praktis.

Daw indi mo gid maangkon ang reputasyon sang katanida sa pagpana paagi sa pagtiro sang blangko nga pader kag dayon drowingan sang mga target ang palibot sang mga baslay. Kinahanglan mo matun-an ang kinaadman sa pagpangita sang target kag pagsakam sini sa tunga.

Pagpinta sang mga Target

Ang pagtiro una kag pagdrowing sang target pagkatapos tiro daw kahalam-utan, pero kon kaisa kita mismo ang nagapakita sang amo sina nga pagginawi sa iban nga sirkumstansya sang kabuhi.

Bilang mga miyembro sang Simbahan, may huyog kita kon kaisa nga iangot ang aton kaugalingon sa mga programa sang ebanghelyo, mga isyu, kag bisan pa gani sa mga doktrina nga daw nakakuha sang aton interes, importante, ukon masadya para sa aton. Nagakatentar kita nga magdrowing sang mga target sa palibot sang mga ini, nga nagapapati sa aton nga nagapunteriya kita sa sentro sang ebanghelyo.

Mahapos lang ini himuong.

Sa tanan nga panahon nakabaton na kita sang maa-yo gid nga mga laygay kag inspirasyon gikan sa mga

propeta sang Dios. Nagabaton man kita sang direksyon kag pagpaathag gikan sa pila ka mga balasahon, mga libro nga gabayan, kag manwal sang Simbahan. Madali naton nga pilion ang aton paborito nga topiko sang ebanghelyo, magdrowing sang iliguan sa palibot sini, kag magsiling nga nakita naton ang sentro sang ebanghelyo.

Ang Manluluwas Nagaklaro

Indi ini problema nga makita lang sa aton panahon. Sang dumaan nga panahon, ang relihiyoso nga mga lider naghinguyang sang dako kaayo nga tiempo sa pagkaling, pagpasunod, kag pagdebate kon diin sa ginatos ka mga kasuguan ang pinakaimportante.

Isa ka adlaw, isa ka grupo sang mga mangin-alamon sa relihiyon ang nagtinguba nga ganuyon ang Manluluwas sa amo nga kontroversiya. Ginhangkat nila Sia nga magtugda sa isa ka isyu nga diutay lang ang nagasugtanay.

“Manunudlo,” pamangkot nila sa Iya, “ano bala ang dakung sugo sa kasuguan?”

Nahibaluan naton tanan kon paano nagsabat si Jesus: “Higugmaa ang Ginuo nga imo Dios sa bug-os mong tagipusuon, kag sa bug-os mong kalag, kag sa bug-os mong hunahuna.

“Ini amo ang dako kag naahaunang sugo.

“Kag ang ikaduha kaangay sa sini, Higugmaa ang imo isigkatawo subong sa imo kaugalingon.

“Sa sining duha ka sugo natingob ang bug-os nga kasuguan kag ang mga manalagna.”¹

Palihog tandai ang ulihi nga ginhambal: “Sa sining duha ka sugo natingob *ang bug-os* nga kasuguan kag ang mga manalagna.”

Ang Manluluwas wala lamang nagpakita sa aton sang target, pero ginpakita Niya ang pinakasentro.

Pag-igo sang Target

Bilang mga miyembro sang Simbahan, nakigsaad kita nga dalhon naton sa aton kaugalingon ang ngalan ni Jesucristo. Kalakip sa sinang saad amo ang paghangop nga tinguahaan naton nga hibaluon ang parte sa Dios, palanggaon Sia, patubuon ang aton pagtuo sa Iya, dayawon Sia, magsunod sa Iya banas, kag magtindog sing mabakod bilang mga saksi Niya.

Mas labi nga matun-an naton ang parte sa Dios kag mabatyagan ang Iya pagpalangga sa aton, mas mearalisar naton nga ang wala'y katapusan nga sakripisyo ni Jesucristo isa ka langitnon nga dulot sang Dios. Ang Dios nagapapagsik sa aton nga gamiton ang banas sang matuod nga paghinulsol, nga nagatuytoy padulong sa milagro sang kapatawaran. Ang ini nga proseso nagatugot sa aton nga mag-angkon sang mas dako nga pagpalangga kag kaluoy para sa mga yara sa aton pali-bot. Matun-an naton nga indi pagtalupangdon ang mga tatak. Mapakigbatuan naton ang tentasyon nga akusaron ukon hukman ang iban sa ila mga sala, kakulangan, musing, politikal nga pagpili, pagpati sa relihiyon, rasa, ukon kolor sang panit.

Makita naton ang tagsa nga masugata naton bilang anak sang aton Amay nga Langitnon—aton utod nga lalaki ukon babayi.

Magadab-ot kita sa iban nga may pag-intiende kag pagpalangga—bisan pa yadtong mga indi mahapos palanggaon. Magapangasubo kita upod sadtong mga nagapangasubo kag magpaumpaw sadtong mga nagakinahanhanglan sang kaumpawan.²

Kag matun-an naton nga indi kita kinahanglan magpalibog parte sa husto nga target sang ebanghelyo.

Ang duha ka dalagko nga kasuguan amo ang target. Sa sining duha ka sugo natingob ang bug-os nga kasuguan kag ang mga manalagna.³ Sa pagbaton naton sini, ang

tanan nga iban pa nga maayo nga mga bagay maplastar lang sa ila husto nga lugar.

Kon ang aton mayor nga ginatutukan, panghunahuna, kag pagpanikasog nakatuon sa pagpadugang sang aton pagpalangga sa Gamhanan nga Dios kag sa pagbukas sang aton tagipusuon sa iban, mahibaluan naton nga nasa-lapuan naton ang husto nga target kag nagapunteriya kita sa pinakasentro—ang mangin tunay nga mga sumulunod ni Jesucristo.

MGA TANDA

1. Mateo 22:36–40.
2. Tan-awa sa Mosias 18:9.
3. Tan-awa sa Mateo 22:40.

PAGTUDLO GIKAN SA SINING MENSAHE

Antes ipaambit ang ining mensahe, mahimo ninyo kantahon ang “Our Savior’s Love” (*Hymns*, no. 113). Dayon binag-binaga ang pagpaisog sadtong inyo gina-bisita nga hunahunaon ang mga “target” sa ila kaugalingon nga mga kabuhi. Mahimo ninyo hambalan ang mga paagi agud siguruhon nga ang duha ka dalagko nga kasuguan—nga “Higugmaa ang Ginuo nga imo Dios” kag “Higugmaa ang imo isigkatawo subong sa imo kaugalingon” (tan-awa sa Mateo 22:37, 39)—amo ang pirme nagagiya sang ila mga buhat. Mahimo man kamo magpaambit sang mga paagi kon paano ninyo gintutok ang inyo mismo kabuhi kay Cristo kag magpaambit sang panaksihon kon paano ini nagbugay sa inyo.

LAMHARON

Ang Isa ka Yuhum Sarang Maghimo sang Kinalain

Si Pangulong Uchtdorf nagmitlang sang duha ka mga lalab-utan para sa aton mga aksyon: higugmaon ang Dios kag higugmaon ang aton isigkatawo. Pero kon kaisa indi amo sina kahapos magpalangga sa iban. Sa bug-os ninyo nga kabuhi, mahimo nga may tinion nga nabudlayan kamo nga magpakigbagay sa iban—basi may nakasakit sa inyo ukon nabudlayan kamo nga makighambal ukon makigbagay sa isa ka tawo. Sa sini nga tinion, tinguhai nga panumdumon ang pagpalangga nga nabatyagan ninyo gikan sa kaabyanan, pamilya,

Amay nga Langitnon, kag kay Jesucristo. Panumduma ang inyo kasadya sa sini nga mga sitwasyon kag panumduma kon ang tanan may oportunidad nga mabatyang ang kasubong nga pagpalangga. Panumduma nga ang tanan anak sang Dios kag nagakabagay sa alangay iya kag inyo pagpalangga.

Magpanumdom sang isa ka tawo sa inyo kabuhi nga nabudlayan kamo makigbagay. Ilakip sila sa inyo mga pangamuyo kag pangabaya ang Amay nga Langitnon nga buksan ang inyo tagipusuon sa ila. Sa indi madugay makita ninyo kon paano Niya ini himuong: bilang isa sa lya mga anak nga nagakabagay palanggaon.

Pagkatapos ninyo magpangamuyo, maghimo sang isa ka maayo nga butang para sa ila! Mahimo nga agdahon ninyo sila sa isa ka kahiwanan sa Mutual ukon maggwa upod sa mga abyans. Magtanyag nga magbulig sa homework assignment. Bisan na lang gani mag "hello" kag magyuhum sa ila. Ang magagmay nga mga butang sarang maghimo sang kinalain . . . sa pareho ninyo nga kabuhi!

© 2012 iya sang Intellectual Reserve, Inc. Tanan nga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/16. Petsa sang pagtugot sa paglubad: 6/16. Paglubad sang *First Presidency Message, January 2017*. Hiligaynon. 97921 861

MGA KABATAAN

Sakam!

Si Pangulong Uchtdorf naghambal nga ang ebang-helyo daw pareho sa praktis patanda-tanda. Kinahanglan naton punteriyahan ang pinakaimportante nga mga butang. Ang pinakaimportante nga mga kasuguan amo ang higugmaon ang Dios kag higugmaon ang iban. Kon tutukan naton ining duha ka mga butang, sarang naton pirme masakam ang aton tuyos!

Magdrowing sang dako nga target sa isa ka panid sang papel. Ipabasa sa isa ka ginikanan ang masunod nga listahan sa inyo. Kon ang isa ka butang sa listahan isa ka bagay nga nagabulig sa aton nga magpakita sang aton pagpalangga sa Dios kag sa iban, isulat ukon i-drawing ini sa tunga sang target.

Magpaambit sang inyo hampanganan

Magpangawat sang dulsi

Magsimba

Magsunlog sang isa ka bata

Magpangamuyo

Hakson ang isa ka tawo

Mag-inaway sa inyo utod



Ang Katuyuan sang Relief Society

Tun-i sing mainampuon ining materyal kag magpangayo sang inspirasyon agud mahibaloan kon ano ang ipaambit.

**Pagtuo, Pamilya,
Bulig**

Ang katuyuan sang Relief Society amo ang “ihanda ang kababayin-an para sa mga bugay sang kabuhi nga wala'y katapsan,” siling ni Linda K. Burton, Pang-kabilugan nga Pangulo sang Relief Society.¹ Paagi sa pagtuo, pamilya, kag bulig nga ginahikot naton ang aton “importante nga bahin sa sini nga buluhaton.”²

Ang Relief Society “isa ka temporal kag espirituhanon nga buluhaton,” siling ni Carole M. Stephens, Unang Manuglaygay sa Relief Society General Presidency. “Amo ini ang ginhimo sang kababayin-an sang panahon sang Manluluwas, kag amo ini ang ginapadayon naton nga himuong.”³

Sa aton pagtulok sa babaying Samariahanon sa bubon, nga nagbiya sang iya suludlan sang tubig kag nagdalagan agud sugiran ang iban nga si Jesus isa ka propeta (tan-awa sa Juan 4:6–42), ukon kay Febe, nga masinadyahon nga nag-alagad sa iban sa bug-os niya nga kabuhi (tan-awa sa Mga Taga-Roma 16:1–2), makakita kita sang mga halimbawa sang kababayin-an sa panahon sang

Manluluwas nga aktibo nga nakigbahin sa pagkari kay Cristo. Sia amo ang nagbukas sang aton dala padulong sa kabuhi nga wala'y katapsan (tan-awa sa Juan 3:16).

Sa aton pagtulok sa aton pionero nga kauturan nga babayi sa Nauvoo, Illinois, nga nagtilipon sa balay ni Sarah Kimball sang 1842 agud tukuron ang ila kaugalingon nga organisasyon, makita naton ang plano sang Dios sa pagpasad sang Relief Society kag suno sa priesthood. Matapos nga ginsulat ni Eliza R. Snow ang konstitusyon, ginrepasso ini sang Propetang Joseph Smith. Narealisar niya nga ang Simbahan wala pa lubos nga naorganisar tubtob nga naorganisar ang kababayinan. Nagsiling Siya nga ginbaton sang Dios ang ila halad pero may mas maayo pa diri. “Organisahon ko ang mga babayi sa idalom sang priesthood suno sa sulundan sang priesthood,” siling niya.⁴

“Ang Relief Society indi lamang isa pa ka grupo sang mga babayi nga gusto maghimo sang kaayuhan sa kalibutan. Lain ini. ‘Mas maayo’ ini tungod gin-organisar ini

sa idalom sang awtoridad sang priesthood. Ang pag-organisar sini isa ka kinahanglanon nga lihok sa paglapnag sang hilikuton sang Dios sa duta.”⁵

Dugang nga Balaan nga mga Kasulatan kag Impormasyon

Doctrine and Covenants 25:2–3, 10; 88:73; reliefsociety.lds.org

MGA TANDA

1. Linda K. Burton, sa Sarah Jane Weaver, “Relief Society Celebrates Birthday and More March 17,” *Church News*, Mar. 13, 2015, news.lds.org.
2. Linda K. Burton, sa Weaver, “Relief Society Celebrates Birthday.”
3. Carole M. Stephens, sa Weaver, “Relief Society Celebrates Birthday.”
4. Joseph Smith, sa *Daughters in My Kingdom: The History and Work of Relief Society* (2011), 11–12.
5. *Daughters in My Kingdom* 16.

Binagbinaga Ini

Paano bala ang Relief Society nagabulig sa kababayin-an nga tumanon ang diosnon nga papel nga gintigana sang Amay nga Langitnon para sa ila kag tuytuyan sila padulong sa kabuhi nga wala'y katapsan?